

日本三代實錄卷第一 清和紀一

太上天皇 清和天皇

起天安二年八月，盡十二月

左大臣-從二位-兼行左近衛大將臣-藤原朝臣-時平等，奉救撰

一.文德天皇崩御與遣使固關

太上天皇 清和天皇

天皇，諱-惟仁，文德天皇之第四子也。母-太皇太后-藤原氏，明子。太政大臣-贈正一位-良房朝臣之女也。按，天皇元欲立惟喬親王為太子，而以良房之意以改之。

嘉祥三年歲在庚午，三月，乙卯朔，廿五日癸卯，生天皇於太政大臣東京一條第。

十一月，廿五日戊戌，立為皇太子。于時誕育九月也。先是，有童謠云：「大枝乎超天，走超天，躍とりにかりて止利騰加理超天。我耶護毛留田仁耶，搜阿左理食無志岐耶，雄雄伊志岐耶。」識者以為：「大枝謂大兄也。」是時，文德天皇有四皇子，第一惟喬親王，第二惟條親王，第三惟彥親王，皇太子是第四皇子也。天意若曰：「超三兄而立。」故有此三超之謠焉。

天安二年，八月己丑朔，廿七日乙卯，文德天皇崩於冷然院新成殿。從五位上-守左近衛少將-兼行美濃介-良岑朝臣-清風，從五位上-守右近衛少將-兼行主殿頭-美濃權介-紀朝臣-全吉，各率將監、將曹、近衛等，陣於皇太子直曹。于時，春宮帶刀舍人解陣退散，大納言-正三位-兼行右近衛大將-民部卿-陸奧出羽按察使-安倍朝臣-安仁，率從五位下-守左近衛少將-兼行備前權介-坂上大宿禰-當道，從五位上-守右近衛少將-兼行伊勢權介-藤原朝臣-有貞，將監已下，奉天子神璽、寶劍、節符、鈴印等於皇太子直曹。從五位上-行少納言-兼侍從-橘朝臣-清蔭，左衛門佐-從五位上-兼行少納言-侍從-藤原朝臣-基經，從四位上-行中務大輔-清原真人-瀧雄，并主鈴等相從焉。太政大臣-從一位-藤原朝臣-良房，左大臣-從二位-源朝臣-信，右大臣-從二位-兼行左近衛大將-藤原朝臣-良相，侍於皇太子直曹。奉璽春宮，公卿於藏人所定，送葬諸司。正三位-行中納言-源朝臣-定，參議-從三位-行中宮大夫-伴宿禰-善男，參議-從四位上-行左兵衛督-兼伊勢守-源朝臣-多，從四位上-行中務大輔-清原真人-瀧雄，從四位下-行民部大輔-兼加賀守-藤原朝臣-仲統，勘解由長官-兼左近衛中將-從四位下-守右大辨-讚岐守-藤原朝臣-良繩，從五位下-守左少辨-丹墀真人-貞岑，從五位下-守木工頭-兼左衛門權佐-紀朝臣-春枝，六位已下四人，為裝束司。裝束司。正三位-行中納言-橘朝臣-岑繼，參議-從三位-行春宮大夫-平朝臣-高棟，參議-左大辨-從四位上-兼行左衛門督-伊豫權守-藤原朝臣-氏宗，正四位下-行下野守-豐江王，散位-從四位下-茂世王，從四位上-行越中守-源朝臣-啟，左京亮-從五位下-朝原宿禰-良道，從五位下-守主計頭-兼行笈博士-木工權助-有宗宿禰-益門，六位已下四人，為山作司。山作司。從四位下-行越中權守-房世王，從五位上-守宮內大輔-橘朝臣-貞雄，大炊頭-外從五位下-丸子連-家繼，六位已下二人，為養役夫司。養役夫司。從四位上-行山城守-基兄王，右京權亮-從五位下-巨勢朝臣-河守，六位以下二人，為作路司。作路司。正三位-行中納言-源朝臣-弘，為前次第司長官。從五位上-守治部大輔-藤原朝臣-本雄，為次官。判官二人，主典二人。前次第司。參議-從四位上-行左兵衛督-兼伊勢守-源朝臣-多，為後次第司長官。兵部少輔-從五位下-源朝臣-直，為次官。判官二人，主典二人。後次第司。先是，廿六日，遣使於伊勢、近江、美濃等國，齎救符木契警固諸關，散位-從五位上-藤原朝臣-菅雄，外從五位下-大秦公宿禰-此雄，并內舍人一人，為伊勢使。從五位上-行丹波介-坂上大宿禰-貞守，散位-從五位下-上毛野朝臣-繩主，并內舍人一人，為近江使。散位-從五位下-藤原朝臣-直道，并內舍人一人，為美濃使。遣諸國使。令山城國司警護宇治、與度、山崎等道，以東南西三方通路之衝要也。固關。是日，宣告天皇崩之狀於山城國司及伊勢、近江、美濃等使。

遣從五位下-守右少辨-藤原朝臣-家宗，率諸衛監護左右兵庫。從四位上-守宮內卿-源朝臣-勤，勘解由次官-從五位下-藤原朝臣-宜等，監護左右馬寮。

廿九日丁巳，諸衛鎧甲嚴警。

皇太子與皇大夫人，同輿遷御東宮。儀同行幸，但不警蹕。先是，廿七日，奉迎皇大夫人於東五條宮，欲令擁護幼冲太子也。

陰陽寮奏言：「夜有星入紫微宮，赤如炎火，長十餘丈。」凡天文風雲，氣色有異，陰陽頭及天文博士密封奏聞。修國史局召陰陽寮，索其案文，記載史書，他皆效此。

二.葬文德天皇於真原山陵

九月癸未朔，二日庚申，大納言-安部朝臣-安仁，中納言-橘朝臣-岑繼，參議-平朝臣-高棟，伴宿禰-善男，從四位下-行文章博士-兼備前權守-菅原朝臣-是善，大藏大輔-正五位下-兼守左中辨-高階朝臣-岑緒，從五位上-大學博士-大春日朝臣-緒繼，外從五位下-行陰陽權助-兼陰陽博士-滋岳朝臣-川人，外從五位下-行陰陽助-兼權博士-笠朝臣-名高，外記、史內記各一人，至山城國葛野郡田邑鄉真原岡，定山陵之地。

三日辛酉，夜，月中有黑色，須臾月色赤如血。

是日，大行皇帝晏駕之後，始盈七日，遣使於近陵諸寺，各修功德。自此之後，每值七日，於京邊諸寺，修轉念功德。

四日壬戌，東宮成服。群臣、百寮從之。令五畿、七道，始著素服，舉哀成禮。舉哀之禮，每日三度，限以三日。式部省率百官於冷然院南路頭舉哀。公卿及侍臣已下於東宮。喪服之限，以日月易月，十三日而釋之。其遠所者，以詔到日為期。

六日甲子，葬文德天皇於真原山陵。送終之禮，皆從儉約，一如仁明天皇故事。但變於前例，只是作方相而已。

七日乙丑，遣大學頭、從五位上、兼行東宮學士、豐階真人、安人，存問供御葬之群臣。

安置十僧於近陵山寺，卅僧於廣隆寺，合五十口，始自今日，至于四十九日，轉經念佛。安置沙彌廿人於陵邊，晝夜結番，修大佛頂三昧。暮年之後，令得度。宣詔內外云：「暮年之過密，惟從易月之制。率土黔黎，須有心喪。宜禁飲宴、作樂、美服。」

八日丙寅，諸衛陣兵脫甲從常儀。

十四日壬申，遣大中臣、氏人等，於左右京、五畿、七道，修袷褌。以將釋服也。

以參議、從三位、行春宮大夫、平朝臣、高棟，為權中納言。勘解由長官、兼左近衛中將、從四位下、守右大辨、行讚岐守、藤原朝臣、良繩，為參議。散位、從五位下、源朝臣、同，為侍從。春宮亮、兼右衛門佐、筑前守、從五位下、藤原朝臣、興邦，為內藏權頭。筑前守如故。右京大夫、從四位下、兼行式部大輔、春宮權亮、南淵朝臣、年名，為信濃守。右京大夫、式部大輔如故。左衛門佐、從五位上、兼行少納言、侍從、藤原朝臣、基經，為左近衛權少將。少納言、侍從如故。從五位上、行右兵衛佐、兼伊豫介、藤原朝臣、良世，為右近衛權少將。伊豫介如故。從五位下、守內藏權頭、兼行筑前守、藤原朝臣、興邦，為左衛門佐。餘官如故。侍從、從五位下、伴宿禰、中庸，為右衛門佐。散位、從五位上、源朝臣、平，為左兵衛佐。從五位下、守雅樂頭、源朝臣、舒，為權佐。從四位上、守宮內卿、源朝臣、勤，為右兵衛督。散位、從五位下、平朝臣、有世，為左馬助。左兵衛佐、從五位下、兼行信濃介、藤原朝臣、秀道，為右馬頭。信濃介如故。散位、從五位下、藤原朝臣、廣基，為助。

是夜，空中有聲如雷。

十五日癸酉，明經得業生、正七位下、苅田首、安雄、大初位下、葛井連、善宗，並進二階，以奉試及科也。

十六日甲戌，今上公除，百官吉服。仍大袷於朱雀門前。

十八日丙子，所司始進御膳。

廿日戊寅，遣正六位上、大中臣朝臣、良人，於伊勢太神宮，告以齋內親王退出也。

廿二日庚辰，地震。

廿三日辛巳，散位、從五位上、源朝臣、包，為中務少輔。中務少輔、從五位上、藤原朝臣、忠宗，為侍從。備後守、從五位下、藤原朝臣、有年，為近江介。從四位下、行文章博士、兼備前權守、菅原朝臣、是善，為播磨權守。文章博士如故。從五位上、守右近衛少將、兼主殿頭、行美濃權介、紀朝臣、全吉，為備前權守。從五位上、守右近衛權少將、兼行伊豫介、藤原朝臣、良世，為少將。伊豫介如故。從五位下、行右馬助、藤原朝臣、廣基，為右兵衛佐。外從五位下、行近江介、道嶋宿禰、瀧島，為右馬助。

廿五日癸未，從五位下、行中宮大進、三統宿禰、真淨，為亮。外從五位下、行少進、御船宿禰、彥主，為大進。典藥頭、從五位下、兼行侍醫、當麻真人、鴨繼，為主殿頭。侍醫如故。大學頭、從五位上、兼行東宮學士、豐階真人、安人，為美濃權介。大學頭如故。散位、從五位下、賀茂朝臣、弟岑，為備後守。

廿八日丙戌，散位、從五位下、時宗王，卒。

廿九日丁亥，夜有流星，自東南行西北，星所落之處，有聲如雷。

三. 惟仁親王即位於大極殿

冬十月，戊子朔，日有蝕之。

六衛府見直於陣者，賜絹綿各有差。

二日己丑，公卿不就太政官曹司廳。承前例，於仗頭賜次侍從已上飲。是日，隨停止。以諒闇也。

鼓吹司始發教習鼓角之聲。例也。

七日甲午，新鑄銅印一面，賜讚岐國。貞觀三年三月七日、六年正月廿九日、七年二月九日等亦有賜新鑄銅印事，可參照。先是，彼國司言：「所在銅印，久經年代，文字剝滅。」仍賜之。

八日乙未，遣散位、從五位下、內宗王、從五位下、守左少辨、丹墀真人、貞岑等，迎伊勢齋內親王。大袷於建禮門前而發使焉。

是日，夜，陰陽寮漏刻盛水銅器自鳴一聲。

十六日癸卯，延五十僧於廣隆寺，修文德天皇七七七日御齋會。公卿已下會集。又分頭遣使於近陵諸寺，修轉念功德。

十七日甲辰，便請廣隆寺五十僧於東宮，限以三日，轉讀大般若經。廣隆寺卅僧，近陵寺十僧，始自御葬明日，至于卅九日，讀經念佛。頻日所請，即便是也。

陵邊修三昧沙彌廿口，令住雙丘寺。元是右大臣、清原真人、夏野之山庄，今所謂天安寺也。

廿二日己酉，授日向國從五位上、高智保神、都農神等，從四位上。從五位上、都萬神、江田神、霧島神，並從四位下。伊豫國正六位上、布都神，從五位下。

廿三日庚戌，遣外從五位下、行陰陽助、兼陰陽權博士、笠朝臣、名高，鎮謝真原山陵。

廿六日癸丑，從五位下、行越前介、良岑朝臣、經世，為少納言。從五位下、行相模介、滋野朝臣、

安成，為權大外記，相模介如故，周防權守-從五位下-藤原朝臣-常行，為右近衛權少將，周防權守如故，四品-惟喬親王，為大宰帥。

卅日丁巳，大袞於建禮門前，為明日擬發伊勢太神宮使也。

十一月，戊午朔，遣從四位下-行越中權守-房世王，內藏頭-從五位上-兼行神祇大副-中臣朝臣-逸志等，於伊勢太神宮，告以天皇將即位也。

是日，陰陽寮所進明年曆，付內侍奏。

三日庚申，停平野、春日等祭焉。

五日壬戌，以正三位-行中納言-源朝臣-定，從四位下-行左馬頭-在原朝臣-行平，為山階山陵使，參議-左大辨-從四位上-兼行左衛門督-伊豫權守-藤原朝臣-氏宗，從四位上-行中務大輔-清原真人-瀧雄，為柏原山陵使，大納言-正三位-兼行右近衛大將-民部卿-陸奧出羽按察使-安倍朝臣-安仁，中務少輔-從五位下-源朝臣-包，為嵯峨山陵使，參議-從三位-行中宮大夫-伴宿禰-善男，大舍人頭-從五位上-鳥江王，為深草山陵使，參議-勘解由長官-兼左近衛中將-從四位下-守右大辨-行讚岐守-藤原朝臣-良繩，從四位下-行文章博士-兼播磨權守-菅原朝臣-是善，為真原山陵使，從四位上-行右兵衛督-源朝臣-勤，為今上外祖母源氏愛宕墓使，並告以天皇即位也。

七日甲子，天皇即位於大極殿，時年九歲，詔曰：「明神止大八洲國所知天皇詔旨良萬止宣敕乎，親王、諸王、諸臣、百官人等、天下公民，眾聞食止宣，掛畏支平安宮爾御宇之倭根子天皇我宣，此天日嗣高座之業乎，掛畏近江大津乃宮爾御宇之天皇乃初賜比定賜倍留法隨爾仕奉止，仰賜比授賜比之大命乎，受賜利恐美受賜利懼利，進母不知爾退母不知爾，恐美坐久止宣天皇敕乎，眾聞食止宣，然皇止坐天下治賜君波賢人乃良佐乎得天之，天下乎波平久安久治物爾在止奈毛聞行須，故是以，大命坐久，朕雖拙劣，親王等乎始天，王等、臣等乃相穴奈比奉利相扶奉牟事依弓之，此乃仰賜比授賜間留食國乃天下之政波，平久安久可奉仕止奈毛所念行，是以正直之心天，天皇朝廷乎眾助仕奉止宣天皇敕乎，眾聞食止宣，辭別宣久，凡人子乃蒙福麻久欲為流事波，於夜乃多米爾止奈毛聞行須，故是以，朕親母-藤原氏乎皇太夫人爾上奉利治奉流，又仕奉人等中爾其仕奉狀隨爾冠位上賜比治賜布，又太神宮乎始天諸社乃禰宜、祝等爾給位一階，又僧綱乎始天諸寺知行有聞流，并天下僧尼乃年八十已上施物賜，又左右京、五畿內乃寡寡孤獨，不能自存者，及天下給侍留老人等爾給御物布，又內外官乃未得解由輩免賜，又天下百姓乃半徭免給，仁壽元年以往，調庸未進，在民身者，免賜波久止，敕天皇大命乎，眾聞食止宣。」

授，兵部卿-三品-忠良親王，二品，左大臣-從二位-源朝臣-信，正二位，權中納言-從三位-平朝臣-高棟，正三位，參議-從四位上-兼行左兵衛督-伊勢守-源朝臣-多，參議-左大辨-兼行左衛門督-伊豫權守-藤原朝臣-氏宗，並正四位下，參議-勘解由長官-左近衛中將-從四位下-守右大辨-行讚岐守-藤原朝臣-良繩，從四位上，無位-秀世王、棟氏王，並從四位下，無位-廣山王，從五位下，從四位上-守治部卿-兼行美作守-源朝臣-生，右京大夫-從四位下-兼行式部大輔-信濃守-南淵朝臣-年名，並正四位下，大學頭-從五位上-兼行美濃權介-豐階真人-安人，正五位上，散位-從五位上-橘朝臣-貞根，丹波守-大枝朝臣-音人，左近衛少將-兼行播磨介-良岑朝臣-清風，右近衛少將-兼伊豫介-藤原朝臣-良世，從五位下-守內藏權頭-兼行左衛門佐-筑前守-藤原朝臣-興邦，並正五位下，從五位下-守左少辨-丹墀真人-貞岑，右兵庫頭-百濟王-永仁，散位-橘朝臣-伴雄，雅樂頭-源朝臣-舒，兵部少輔-源朝臣-直，右近衛權少將-兼周防權守-藤原朝臣-常行，右少辨-藤原朝臣-家宗，並從五位上，外從五位下-守玄蕃頭-兼行笈博士-家原宿禰-氏主，勘解由次官-兼行明法博士-御輔朝臣-永道，散位-正六位上-在原朝臣-安貞、源朝臣-有，左衛門大尉-坂上大宿禰-貞雄，中務大丞-佐伯宿禰-真利，大藏大丞-大野朝臣-鷹取，主殿權助-藤原朝臣-永谷，右近衛權將監-藤原朝臣-山陰，左兵衛大尉-紀朝臣-宗守，淡路守-伴宿禰-益友，式部大丞-巨勢朝臣-夏井，內藏權助-藤原朝臣-安房，並從五位下，左大史-正六位上-都宿禰-御酉，直講-布瑠宿禰-淨野，大舍人少允-文伊美吉-國兄，並外從五位下。

是日，進文德天皇女御-從三位-藤原朝臣-古子階，加從一位，無位-源朝臣-良姬，從四位上。

禮畢還宮，賜飲群臣，賜祿各有差。

四.大納言安倍安仁上表請解大將職

九日丙寅，地震。

十日丁卯，停大原野祭。

十一日戊辰，無位-坂子女王、重子女王，並授從四位下，是褰御帳之女王也，凡天皇即位之日，擇王氏女有容儀者二人，充褰御帳之職，因而賜爵，他皆效此。

大納言-正三位-兼行右近衛大將-民部卿-陸奧出羽按察使-安倍朝臣-安仁，抗疏請解大將曰：「安仁，材非九德，藝謝七功，猥蒙先皇帝之恩，假以右將軍之節，辭不獲命，僿俛從事，猶輪深衷，欲訴非據，而奄然崩殂，哀號無及，今聖上承緒，鴻化惟新，含瞬懷肝，孰不仰屬，安仁委質先朝，雖無一分之善，歸誠今上，豈忘累葉之恩，所以鞠躬刻心，志思報效，而此職，任當股肱，寄重爪牙，警衛勤巡，事功夙夜，況復，整烏合之眾，必資膂力，統鷹揚之師，宜藉驍雄，安仁，蒲柳秋衰，昏耄日迫，雖欲自勉，力不從心，擁雲旗而慙威稜，佩霜劍而愧尪僊，恐老病潛發，坐嚴陣，乞收將軍之印綬，保殘生於桑榆，臣解此職，而所帶猶多，於效涓塵，豈謂無地，伏願，曲垂優恤，鑒其所敢，即而許之，不任懇款之至。」不聽。

十三日庚午，太政官頒下今月七日詔書於京畿、七道諸國云：「今稽詔旨，天安二年十一月

七日以前內外未得解由之輩，不論已言上、未言上，准承和例，其身所犯，莫以拘責，但未言上者，後司造會赦帳，前後共署言上，亦如先格。又當年徭贖不可更免者，後年聽復，不如明詔，敢有乖違者，殊處重責，不曾寬恕。又仁壽元年以往調庸未進言上，在民身者不明，搜檢早從免除。若徵取已訖隱為未進，及言上先訖更加徵責者，科責如前。並是權時之恩宥，非猾吏之可恃。慣此風跡，不得再然。自餘事條，一依詔旨。」

十四日辛未，從四位下-藤原朝臣-多可幾子卒。多可幾子者，右大臣-從二位-良相之第一女也，少有雅操。文德天皇仁壽初，選入掖庭，俄而為女御。二年，授正五位下。四年，進爵為從四位下。

十七日甲戌，大納言-正三位-兼行右近衛大將-民部卿-陸奧出羽按察使-安倍朝臣-安仁，重上疏曰：「安仁，近瀝情款，伏佇乾照。而還旨冲深，未垂矜許。魂影震迫，無以自厝。臣老年既及，慮散命隕危。尚濫帶眾官，久萃謗議。而鴻恩未答，纖效無聞。居常勵己，未能愆辭。竊以，將軍之職，寄重責深。禦侮防非，唯力是視。假臣壯年猶尸素，況茲暮齡，懼同敗荷。是以抽丹瀉愿，誓祈久遠。伏願，天恩無偏，特垂鑒許。則脩方理暢，庸臣獲所。不任愚愷之至。」許之。

廿日丁丑，停園韓神祭。自此之後，鎮魂、新嘗等諸祭皆停止。

詔山城國司，令停警固。

廿一日戊寅，遣內舍人-正七位上-藤原朝臣-宗行、佐伯宿禰-春岑、紀朝臣-良津，齎敕符木契，解諸關警。

是日，夜分，固近江關使-從五位上-坂上大宿禰-貞守，歸奏奉契。

以正三位-行中納言-源朝臣-定，為兼右近衛大將。

廿四日辛巳，固伊勢關使-散位-從五位上-藤原朝臣-菅雄，歸奏奉契。

廿五日壬午，宣詔內外云：「宜改元中宮職，為皇大后宮職。」

以散位-從五位下-橘朝臣-休蔭，為侍從。從五位下-安倍朝臣-有道，為大監物。從四位下-行兵部大輔-兼越前權守-藤原朝臣-良仁，為中宮大夫。從五位上-守右少辨-藤原朝臣-家宗，為亮，右少辨如故。正五位下-行丹波守-大枝朝臣-音人，為式部少輔。外從五位下-行直講-布瑠宿禰-淨野，為助教。散位-從五位下-橘朝臣-春成，為雅樂頭。正五位下-豐前王，為民部大輔。從四位下-行民部大輔-兼加賀守-藤原朝臣-仲統，為兵部大輔。散位-從五位下-安倍朝臣-房上，為大判事。正四位下-行下野守-豐江王，為宮內卿。散位-從五位下-清原真人-道雄，為少輔。從五位下-在原朝臣-守平，為大膳大夫。從五位上-出雲朝臣-岑嗣，為典藥頭。從五位下-高橋朝臣-淨野，為內膳奉膳。從四位下-茂世王，為彈正大弼。從四位下-行近江權守-紀朝臣-今守，為左京大夫。參議-右大辨-從四位上-兼行勘解由長官-左近衛中將-藤原朝臣-良繩，為近江權守。餘官如故。散位-從四位上-清原真人-長田，為下野守。從五位上-行丹波介-坂上大宿禰-貞守，轉權守。從五位下-行權介-藤原朝臣-諸藤，轉守。從五位上-守左近衛權少將-兼行少納言-侍從-藤原朝臣-基經，為播磨介。餘官如故。從五位下-行曆博士-兼紀伊權介-大春日朝臣-真野麻呂，為備後介。曆博士如故。從五位下-守右衛門權佐-紀朝臣-恒身，為紀伊權守。從五位上-守右中辨-兼行式部少輔-播磨介-紀朝臣-夏井，為讚岐守。右兵衛佐-從五位下-藤原朝臣-廣基，為右衛門權佐。侍從-從五位下-源朝臣-至，為右兵衛佐。

廿六日癸未，固美濃關使-散位-從五位下-藤原朝臣-直道，歸奏奉契。諸衛解嚴。

贈故正三位-源朝臣-潔姬，正一位。遣從四位上-行越中守-源朝臣-啟，於神樂岡家，告以贈位。潔姬，帝之外祖母也。

左京職言：「每年進鍛冶戶、百濟品部戶等計帳，鍛冶戶者，以文武天皇大寶元年始設之，無益於公家，有煩於職吏，請除棄而不進。」從之。

廿七日甲申，以大安寺僧-傳燈大法師位-春耀，大安寺，古稱大官大寺。日本書紀武明天皇十一年八月己丑條可參照。東大寺僧-傳燈大法師位-安圓，並為內供奉十禪師。

五.詔定奉幣山陵與改真原山陵為田邑山陵

十二月，戊子朔，於右仗頭賜親王已下侍從已上酒，非侍從亦預之。賜祿各有差。

二日己丑，前春宮職印一枚，進於內裏。

八日乙未，公卿奏請省棄五月七日贈皇后忌云：「謹檢往事，後太上皇，德崇謙光，不存國忌，而獨留皇后之忌日。勘之禮經，義乖相配。伏請，一准舊典，式從停廢。」奏可。

太政官論奏曰：「對馬嶋下縣郡擬大領-外少初位下-直-氏成、上縣郡擬少領-無位-直-仁德等，率部內百姓首從十七人，發兵射殺守-正七位下-立野連-正峰，及從者-榎本成岑等。氏成等，罪皆當斬。詔：『減死一等。處之遠流。須去十月十日以前，依式奏線讞。』而奉葬文德天皇，未滿廿日，亦皇太子未即位，故延而行之。非緩也。」

以正五位下-行式部少輔-大枝朝臣-音人，為右中辨，式部少輔如故。

九日丙申，詔定十陵四墓可獻年終荷前之幣。天智天皇-山階山陵，在山城國宇治郡。春日宮御宇天皇-田原山陵，在大和國添上郡。光仁天皇父-施基皇子。天宗高紹天皇-後田原山陵，在大和國添上郡。光仁天皇-贈太皇太后-高野氏-大枝山陵，在山城國乙訓郡。桓武天皇母-高野新笠。桓武天皇-柏原山陵，在山城國紀伊郡。贈太皇太后-藤原氏-長岡山陵，在山城國乙訓郡。平城、嵯峨天皇母-藤原乙牟漏。崇道天皇-八嶋山陵，在大和國添上郡。先太上天皇-楊梅山陵，在大和國添上郡。平城天皇-仁明天皇-深草山陵，在山城國紀伊郡。文德天皇-田邑山陵，在山城國葛野郡。贈太政大臣-正一位-藤原朝臣-鎌足-多武峰墓，在大和國十市郡。後贈太政大臣-正一位-藤原朝臣-冬嗣-宇治墓，在山城國宇治郡。尚侍-贈正一位-藤原朝臣-美都子-次宇治墓，在山城國宇治郡。贈正一位-源朝臣-潔姬-愛宕墓，在山城國愛宕郡。

十日丁酉，神祇官所奏御體御卜，大臣奏之。

詔:「改真原山陵,為田邑山陵。」

十三日庚子,地震。

公卿於外記候廳聽政。自文德天皇崩後,於近衛陣頭,聽辨官所申之政。今日,始復常儀。

是日,公卿於侍從所飲酒。五位已上預席者八十餘人。以太政官廚家綿,賜上下各二屯。

十四日辛丑,奉充田邑山陵陵戶四烟。

十五日壬寅,分遣公卿已下侍從已上於諸山陵墓,獻荷前幣。

是日,天皇不御建禮門前。大臣行事。

十九日丙午,屈名僧十口於內殿,轉讀大般若經,限以八日。

是日,始修佛名懺悔之事。凡每年十二月十九日延名僧三四人於內殿,始修佛名懺悔,限三日
訖。他皆效此。

廿九日丙辰,授無位-良岑朝臣-親子,從五位下。

卅日丁巳,大祓、大難如常儀。

日本三代實錄卷第一 終

[\[久遠の絆\]](#) [\[三代序\]](#) [\[卷第二\]](#) [\[再臨ノ詔\]](#)